

ADDENDA AO CONVENIO DE COLABORACIÓN ENTRE A SECRETARÍA XERAL DA EMIGRACIÓN DA XUNTA DE GALICIA E O HOGAR ESPAÑOL DE MONTEVIDEO (URUGUAI) PARA CONTRIBUÍR Á ATENCIÓN DAS NECESIDADES SOCIO ASISTENCIAIS BÁSICAS DOS CIDADÁNS GALEGOS.

Santiago de Compostela, 16 de outubro de 2020

Con data 18 de maio de 2020, a Secretaría Xeral da Emigración asinou un convenio de colaboración co Hogar Español de Ancianos de Montevideo, Uruguai.

Na cláusula primeira do mencionado convenio sinálase o seu obxecto, que é o de establecer o marco da colaboración entre as entidades asinantes para contribuír á prestación de asistencia aos cidadáns galegos que residen no Hogar Español de Montevideo, que por razón de carencia ou de dependencia se atopen en situación de necesidade e non poidan afrontar o custo da súa estancia.

Na cláusula octava, obrigas das partes, o Hogar comprométese a manter as instalacións e o equipamento do Hogar, e dotalo de persoal especializado e do material consumible necesario para o seu correcto funcionamento e promover o benestar das persoas beneficiarias de orixe galego acollidas no Hogar, favorecendo a súa integración, participación e relación co medio social, prestándolles servizos de vivenda, alimentación, hixiene persoal, asistencia médica, enfermería, talleres recreativos, de estimulación cognitiva, asistencia social, animación socio cultural, entre outros.

Na cláusula terceira do convenio establécese unha achega económica da Secretaría Xeral da Emigración por un importe global de corenta mil euros (40.000,00 €), con cargo á aplicación orzamentaria 04.30.312C.481.0 dos orzamentos xerais da Comunidade Autónoma de Galicia para o ano 2020.

O Hogar Español de Montevideo é unha sociedade civil de beneficencia fundada hai máis de 50 anos por emigrantes españois, na súa gran maioría galegos, destinada a acoller aos anciáns da colectividade que se atoparan sos, desamparados de familiares ou con graves carencias de recursos. Na actualidade a institución alberga a 163 residentes, dos cales, 92 (56,44 %) son nados en Galicia. Esta porcentaxe estase vendo aumentada a cotío debido ao progresivo avellentamento da colonia galega residente en Uruguai, o que orixina, por unha banda, máis solicitudes de internamento de persoas con maior

idade mes a mes e por outra, o maior custo na atención e nos medicamentos que se han de proporcionar.

Ademais a pandemia motivada pola Covid-19, do mesmo xeito que noutros países, obrigou ao Ministerio de Saúde Pública da República Oriental do Uruguai a establecer protocolos especiais de actuación nas residencias de maiores, que implicaron a reordenación da distribución dos residentes, a creación dunha área de illamento, o uso de equipos especiais, as medidas de hixiene, etc, cuxa implantación supuxo un gasto moi importante para a entidade que lle afecta á súa estabilidade económica.

As circunstancias indicadas, e sobre todo o custo das medidas implantadas con motivo da Covid-19, están a crear graves dificultades na financiación prevista na institución para o presente ano, polo que co fin de manter a atención das persoas acollidas é preciso incrementar o importe da achega da Secretaría Xeral da Emigración en 50.000 €.

E por outro lado co fin de dar cumprimento ao previsto no convenio, tendo en conta o contido desta addenda resulta igualmente necesario modificar os prazos de xustificación e de vixencia do convenio contemplados inicialmente.

Na súa virtude, ambas as dúas partes, no nome e representación no que concorren e coa capacidade legal para este acto,

ACORDAN

Cláusula Primeira: Incrementar a achega da Secretaría Xeral da Emigración prevista na Cláusula Terceira, que queda redactada do seguinte xeito:

“Para o financiamento das actuacións previstas, a Secretaría Xeral da Emigración achegará, dos Orzamentos Xerais da Comunidade Autónoma de Galicia para o ano 2020, a contía de **NOVENTA MIL EUROS (90.000,00 €)**, con cargo á aplicación orzamentaria **04.30.312C.481.0** Axudas a entidades no ámbito das migracións, para gastos de funcionamento da residencia de maiores”.

Cláusula Segunda: Modificar os prazos de xustificación e de vixencia contemplados na Cláusula Sexta parágrafo primeiro, que queda redactada do seguinte xeito:

“O prazo de xustificación deste convenio remata o 10 de decembro de 2020”.

e Cláusula Décimo quinta, que queda redactada do seguinte xeito:

Este convenio entrará en vigor ao día seguinte ao da súa sinatura e estenderá a súa vixencia ata o 31 de decembro de 2020, agás que sexa denunciado por algunha das partes, por incumprimento dos acordos que nel se recollen

E, en proba de conformidade, ambas as dúas partes asinan esta addenda, por duplicado exemplar, no lugar e data indicados no encabezamento.

O SECRETARIO XERAL DA
EMIGRACIÓN

O PRESIDENTE DO HOGAR ESPAÑOL
DE MONTEVIDEO

Asdo.: Antonio Rodríguez Miranda

Asdo.: Ángel Domínguez Castro